

Pilemona

1

- ¹ NA Paulo he pio no Iesu Kriato, a na Timoteo ka hoahanau, ia Pilemona i ko maua mea aloha, a me ka hoalawehana,
- ² A ia Apia hoi i alohaia, a ia Arekipo i ko kakou hoakoa, a i ka ekalesia hoi iloko o kou hale:
- ³ Ia oukou ke aloha a me ka maluhia mai ke Akua mai o ko kakou Makua a me ka Haku o Iesu Kristo.
- ⁴ Ke hoomaikai mau aku nei au i ko'u Akua, e hoohiki mau ana ia oe ma ka'u pule ana,
- ⁵ I ko'u lohe ana'ku i kou aloha a me kou manaoio i ka Haku ia Iesu, a i ka poe haipule a pau;
- ⁶ I lilo ka hui ana mai o kou manaoio i mea ikaika e hooiaioia mai ai na mea maikai a pau iloko o oukou no Kristo Iesu.
- ⁷ No ka mea, he nui no ko makou olioli a me ka oluolu no kou aloha, no ka mea, ua hoohoi-hoilia ns naau o ka poe haipule e oe, e ka hoahanau.
- ⁸ Nolaila, oiai ua hiki no ia'u iloko o Kristo ke kauleo ikaika aku ia oe i ka mea e pono ai;
- ⁹ Aka hoi, no ke aloha, ke makemake nei no au e nonoi malie aku, owau no, o Paulo ka elemakule e noho nei, a he pio no hoi no Iesu Kristo;
- ¹⁰ Ke nonoi aku nei au ia oe no ka'u keiki a'u i hoahanau aku nei iloko o ko'u paa ana, no Onesimo:

- ¹¹ Ka mea pono ole nou mamua, ano hoi he mea pono io no kaua:
- ¹² Oia ka'u e hoihoi aku nei; nolaila e hookipa oe ia ia, oia hoi, o kou naau iho.
- ¹³ Ua makemake nae au e kaohi ia ia e noho pu me an, i hiki ia ia ke malama mai ia'u nou, i kuu paa ana no ka euanelio:
- ¹⁴ Aka, aole loa o'u manao e hana pela me kou ae ole mai; i like ole keia pono ou me he mea la i kaili wale ia aka, no ka naau mai.
- ¹⁵ No ka mea, ua hookaaawaleia mai paha ia i ka wa pokole i lilo hou aku ia nou mau loa;
- ¹⁶ Aole me he kauwa la ma ia hope, aka, me he mea la e oi i ke kauwa, he hoahanau punahele, pela io ia'u, a he oiaio maoli no ia oe, ma ke kino, a maloko hoi o ka Haku.
- ¹⁷ A ina i manao mai oe ia'u he hoalawepu, e hookipa oe ia ia e like me ia'u uei.
- ¹⁸ A ina ua lawehala oia i kau, a ua aie paha, o kau ia e hooili mai ai maluna o'u;
- ¹⁹ Na'u na Paulo nei i kakau iho keia me ko'u lima ponoi, na'u ia e uku aku; aole nae me ka olelo aku ia oe, o oe iho no ka i aie ia oe iho na'u.
- ²⁰ Oiaio hoi, e ka hoahanau, no'u kahi olioli ia oe iloko o ka Haku; e hoomaha mai oe i ko'u naau maloko o ka Haku.
- ²¹ No ka paulele aku i kou hoolohe ana mai, ua palapala aku au ia oe, me ka ike aku hoi e oi aku no kau hana ana mamua o ko'u olelo ana'ku.
- ²² Eia kekahī, e hoomakaukau e oe i wahi no'u e moe ai; no ka mea, ke manaolana nei au,

no ka oukou pule ana e haawiia'ku ai au ia
oukou.

²³ Ke aloha aku nei ia oe o Epapera, o ko'u hoapiro
iloko o Kristo Iesu;

²⁴ A o Mareko, a o Arisetareko, o Dema, o Luka hoi,
o ko'u mau hoalawehana.

²⁵ E alohaia mai ko oukou uhane e ko kakou Haku
e Iesu Kristo. Amene.

**Baibala Hemolele
The Holy Bible in the Hawaiian language of the United
States, 1868 revision**

Public Domain

Language: 'Olelo Hawai'i (Hawaiian)

Translation by: na na misionari i pai

2015-11-10

PDF generated using Haiola and XeLaTeX on 11 Nov 2022 from source files
dated 9 Oct 2020

4fde4536-9f74-574b-8404-d9ec34a30cbb